

LESEDI LE LEHOLO

LE PHATSIMANG

 Sehlooho sa ka hoseng hona se fumanwa Testamenteng e Ntjha. Pele e tla ba palo ya Lengolo ho Mattheu wa 1... kgaolo ya 2, ho qala ka temana ya 1. Mme hape ke batla ho nka, jwalo ka sehlooho, ho tswa kgaolong ya 4, le ditemana tsa 14 le ya 15. Ke rata ho bala Lentswe, hobane Lentswe ke Modimo.

Jwale eitse ha Jesu a tswaletswe Bethlehema wa Judea mehleng ya morena Heroda, bonang, ba bohlale ba botjhabela ba fihla Jerusalema,

Ba re, O kae ya tswetsweng morena wa Bajude? hobane re bone naledi ya hae botjhabela, mme re tlide ho mo kgumamela.

² Hape kgaolong ya 4 le temaneng ya 14, e buang ka moporofeta.

Hore ho etsahale ho boletsweng ke moporofeta Esaia, ha a re,

Lefatshe la Zabulone, le lefatshe la Nefthali, tseleng ya lewatle, mose wa Jordane, Galilea wa Ditjhaba;

Setjhaba se neng se dutse lefifing se bone lesedi le leholo; mme lesedi le tjhabetse ba neng ba dutse dinaheng tsa lefu le meriting ya lona.

³ Ke lakatsa ho ntsha sehlooho sa ka ho tswa... e le sena: *Lesedi Le Leholo Le Phatsimang.* Ehlide ke Lengolo le sa tlwaelehang.

⁴ Mona, ka nako ena, esale batho ba rera haholo ka “ha ho sebaka tlung ya baeti,” sehleng sa keresemose, le “Josefa le Maria,” le—le ka “tswalo ya Morena Jesu.” Ke ne ke nahanne maobane hore ke tla leka ho e atamela ka tsela e fapaneng, le eo bongata ba lona bo e utlwang diyalemoyeng tsa lona le dithelebisheneng.

⁵ Mme yare ke sa nahanne, sena sa fihla kelellong ya ka, mabapi le banna ba bohlale le naledi. Mme ntho e ntjhabetseg e le hore, ebe, monna ya bohlale o amana jwang le Kreste? Ka baka leo, ka ho bala barutehi ba bangata ba sekgale-kgale, maobane bosiu, haholo, ke bile ka robala desekeng, ke leka ho fumana ntho e tla tjhabisa lesedi le lenyenyan hodima temana ya kajeno.

⁶ Hape, ke ntho e sa tlwaelwang ho bua ka dintho tsena, hobane, hodima tsohle, Modimo ha o a tlwaeleha. Modimo o

sebetsa dintho ka tsela e sa tlwaelehang, mme ka nako tse ding mehleng e sa tlwaelehang, hobane haholo ha A tlwaeleha. Mme ba Mo sebeletsang ha ba tlwaeleha; ke batho ba mohlolo.

⁷ Ka baka leo rona, nakong ena ya sehla, ere re sa tsepamisa kelello ya rona ho Keresemose, ho hobe haele moo re e bala e le tshomo e bitswang “Santa Klause,” ho ena le seo Keresemose ya nnete e tlamehileng ho ba sona. Bana ba bangata naheng kajeno ha ba tsebe letho haese hore Keresemose e bolela “selei se hlohluweng dibapadiswa, le dikgama tse hlollang tse tilang hodima ntlo,” ba ntoo ithuta hamorao ka tshomo ena; taba e thonkgang tumelo ya bona, ka nako ha ba ithuta pale ya nnete ya Keresemose, hore e ne e sa amane le dikgama ka letho, kapa monna ya tsubang peipi, ka baki ya hae e boyo.

⁸ E ne e le tswalo ya Morena Jesu wa rona ya bokwang. Mme hase tlwaelo ho bona kamoo Modimo a sebeditseng ka tsela ena, hoba ha ho nako e ka beng e sebeditse, nalaneng yohle ya lefatshe. E ne e tlamehile ho hlaha nakong ena hantle. Mme jwale ha re shebeng sehla sena hantle metsotso e mmalwa.

⁹ Ke mohla Heroda, mmolai, e ne e le morena. E ne e loketse jwalo, monna enwa ya pelo e mpe o ne a tlamehile ho ba morena nakong eo, hoba re tseba Mangolo a itseng o “ile a bolaya bana bohole ho qala ka ba dilemo tse pedi ho theoha,” a leka ho fumana Kreste. Mme e ne e tlamehile feela ho ba nakong eo.

¹⁰ Mme hape eka kgona ho be le, nakong eo, ho fihla tefiso ya lekgetho, e le hore Maria le Josefa ba tle ba boeile motseng wa habo bona wa Bethlehem moo ba ngodisitsweng teng, mme ditswalo tsa bona tsa hlaha direkotong tsa makgotla le tempeleng, ho lefiswa lekgetho. Mme Kreste o ne a tla tswallwa Bethlehem, mme mohla sena se hlahang keha ba le hole haholo.

¹¹ Mme re lemositswe ditsietsi tseo ba neng ba loketse ho di feta, ho ka fihla mono. Jwale ba ne ba se na amalanse e kgolo, e majabajaba ho palamisa Maria ho mo isa mono. Mme dintho di sa ba tsamaele jwalo ka kajeno, moo re ka bang le boitatolo ba mofuta. E ne e le taelo ya morena. Ha ho meitatolo ya letho e etswang. E tshwanela ho phethiswa. “Morena o itsalo!” Ho sa tsottelehe maemo a hae, leha e le eng, ba tshwanela ho boela lehaeng la bona. Ha ho manobonobo a letho ho mme wa moimana. Mme ha ho mokgwa wa ho tsamaya; ke ka maoto feela, kapa hodima mokokotlo wa eselana.

¹² Mme re bolellwa hobane Josefa o ile a nka Maria, mme enwa wa moimana nakong eo, mme a mo hlwesa mopopotlong wa eselana. Mme ha motho a kile a kalla ese, o tseba kamoo e kgohlopang kateng. Thakanyana leo, la tsamaya tselaneng e sesane e tswedikanang e nyoloha dithaba, e tlang Bethlehem, ho tswa Judea e tlase, tsela e makukuno le e kgohlahetseng. Ho ka thweng hola ditlhako tsa eselana di ne di sa tsitsa, mme ebe e kgotjwe e we ka mme enwa wa moimana?

¹³ Kapa, matsatsing ao mohla ho ne ho tsamauwā hakana ho kenwa mahaeng a bona, naħħa yohle e phethesela, e tletse baeti le bahahlaudi, ba kgutlelang lehaeng, madulo a matle ho bakgothotsi matsatsing ao. Ha ba bona diħlotshwana tsa batho; bakalli, bakgothotsi ba ka be ba kene hantle mme ba ba bolaye, mme ba ikgapele thepa ya bona ba ntoo ikela. E le ntho e kakang ho bathwana ba babedi bana ba nyālaneng, ba neng ba tlameha ho tjamelana le yona, le kamoo ho ka beng ho etsahetse!

¹⁴ Ebile, hola dibata tse ding tse hlaha, etswe ho ne ho le dittau le tse ngata tse rusullang, diphoofolo tse hlaha tse diilang mahwatateng ao ba lokelang ho a parola. Hola sebata se hlaha sa hlasela moifonyana oo, Josefa o be a ka etsang ka molangwana letsohong la hae, mme mosadi a batla a sa kgone ho tsamaya? Keha ba tlamehile ho tobana le hoo.

¹⁵ Empa re tshediseha ho tseba sena, hore ha se rona ba fupereng mafinyello a rona. Modimo ke wona o fupereng mafinyello a rona. Mme O baletse jwalo, mme ha ho letho le ka sitisang lenaneo la Modimo. Re tlamehile ho fihla.

¹⁶ Mme tshabo e ne e sa tlameha ho ba teng. Mme empa mohlomong Maria le Josefa, ka bobona, bathwana ba tlwaelehileng feela, ba sa ruteha. Mme ho bona ho se mokgwa wa ho tseba dintho tsena, tse etsahalang nakong eo, hore e ne e le ho tlatsa Mangolo.

¹⁷ Mme ho a tshwana le kajeno. Dintho di etsahala hantle tsatsing lena leo re phelang ho lona, mme bongata ba rona ha re tsebe letho ka yona, kamoo Modimo a tsamayang kateng.

¹⁸ Ke botsitswe ke e mong wa mafumahadi a ka phaposing ya kgatiso mona, ha ke ne ke bua ka temana eo, ya mongolo, le ka seputiniki sebakeng. “E ka etsahala Sontaha se tlang?”

Ka re, “Ha ke tsebe.”

¹⁹ Empa, oh, ho bona nakong ya lefifi lena le kgurumetsang, letsoho le leholo la Modimo le tsamaya ka botsitso. Ha ho letho ho Le kgina.

²⁰ Mme re ka bona kamoo ho bileng kateng, kajeno, ha eselana le baeti ba babedi ba fihla qetellong. Ha ba fihla bosiu, ho tshela mahwatata, keha ho tħhesa hakakang! Mme ha re re ba dutse feela hodima thabana ka nqa botjhabelha ho Bethlehema.

²¹ Bethlehema e dutse phuleng, mme ho be le thabana. Mme tsela e kenang Bethlehema, e poromela nqa botjhabelha ho Bethlehema, mme e lepella e kena motseng. Pela kou, moo o jang mothinya wa ho qetela, ho theosa ka leralla, ho qħobellane qubuhadi ya majwe a makukuno mono. Mme boranalane ba lekanya e le hona moo Maria le Josefa ba kgħefuditseng teng nakwana ho ntsha letshweya pele ba honyella motseng bosiusg boo.

²² Ha re boneng Josefa, ka matsoho a mosa, o theola monyaduwa wa hae e monyenyan eselaneng mme o mo thusa ho hata fatshe, a mo kuke a mmehe hodima lejwe, le ho re, “Moratuwa, motsana ke oo, ka tlasana ho rona feela, moo mohlomong setlabotjha sa rona se tla tswallwa teng.”

²³ Eka re ke a bona ha dinaledi di tshwedima hasesane mme di redimoloha, ba sa dutse ba shebile Bethlehem, ntho ya bona...ka botjhabela ho bona. Mme yare ba sa dutse mono, ba ipotsa ha ba sheba dinaledi; kwana, dimaele tse makgolo botjhabela ho mono, ketsahalo e nngwe e ntse e itshebetsa.

²⁴ Le a tseba, Modimo o sebetsa bokahohleng ba Hae. O etsa dintho naheng e nngwe, teng A e bope, ho ngomelana le ya le leng. Mono re a bona, kwana botjhabela, kamoo re bolellwang kateng ke boranalane ba bangata, hore mathaka ana, ba-bohlale, ho latela kamoo re ba tsebang.

²⁵ Kajeno bonnyane, ba ka bitswa, “balepi ba dinaledi,” e seng mokgweng wa dinohe; empa sesomo se teng boleping ba dinaledi, e leng ho bitswang dinohe. Mme batho ba seohela dinthong tseo, e mpa e le kutlwisiso ya moshaqane papisong le molepi wa sebele wa dinaledi.

²⁶ Hampton o re boleletse, ranalane e moholo, hore e ne e le...E ne e le Bamede-le-Bapersia, balepi bana ba dinaledi. Ha re saleng mohlala wa bophelo ba bona morao nakwana. Mme re fumana Bamedi-le-Bapersia ba tsebile Evangedi ya Morena wa rona mohla ba leng tlase Babilona. Dilemo pele ho moo, mehleng ya Morena Nebukadnezare, ba ne ba ena le batho ba jwaleka balepi ba dinaledi, ba neng ba lekola dinaledi le makgotla a lehodimo. Mme ba ka bolela ka dipontsho le ka ho tsamaya ha dinaledi, dintho tse tlang ho hlaha.

²⁷ Mme marena a ditshiu tsa mehleng a ne a botsa monna ya jwaana ho tsebisia ditaba le dintho tse tla hlaha. Kamehla Modimo o e tlaleha ka makgotla a Hae a lehodimo pele A e tsebisa lefatshe. Modimo o e ngola mahodimong.

²⁸ Mme naledi eo re e tadinang, mme re di nka e le maqluwana a kgutlo-hlano mahodimong, empa, seo di leng sona, ke mafatshe a maholohadi ho feta lena, a hadimisang lesedi la letsatsi.

²⁹ Mme ruri batho bana ba tsebane le Evangedi dilemong tsa kgoleho ya Israele, ya dilemo tse mashome e supileng lefatsheng la Bakalde, mme, ruri, Daniele o ne a behwe hloho ya ba-bohlale. Moporofeta, ka bohlale ba hae bo phahamileng ho tseba qetello ya dintho, le ho tseba seo Modimo a tla se etsa, mme a bitswa hloho ya ba-bohlale ke hona. Mme ba-bohlale ba ne ba bolokile dingolwa tsa kgale tseo ba lebisang ho tsona, tsa bontata bona moholo. Mme Daniele o kenya Dingolwa tsa Morena.

³⁰ Mme ka hona re utlwisia hore kgabareng ya nako ena ba ne ba eletsana mmoho, mme ba bone bohlale le matla ao Modimo o le mong le wa nnete a a hlahisitseng, a neng a feta molepi ofe feela wa dinaledi kapa ra-mahlale. Hoo ho pakilwe phirimana ya Morena Nebukadnezare...kapa motjekong wa Belshatsare, hore, ha ho a fumanwa Mokalde kapa molepi wa dinaledi ya ka balang mongolo wa letsoho leboteng. Empa Daniele, ka Moya le ka matla a Modimo o phelang, o kgonne ho etsa hoo. Mme mengolo ya hae e bile ya bolokwa e halalela, mme e sa le jwalo ho fihlela kajeno.

³¹ Jwale re ba bitsa, kwana botjhabela...Nkile ka fumana monyetla wa ho qoqa le bona kwana India. Mme hajwale ba bitswa Mahamede. Empa ruri e ne e le Bamede-le-Bapersia. Maindia a bitswa...Ke a kgolwa ba bitswa batho ba sa hlwekang. Mme hantle-ntle Bamede-le-Bapersia ke Mohamede. Mme ke bona ba phetseng le Morena Nebukadnezare sethatong. Mme ditsebi tsa bona tse kgolo e ne e le barutehi ba ithutileng e—e dintho tsa tlholeho, ho tlaleha dintho tsa semoya tse neng di tla etsahala.

³² Ka hona dilemong tsena tse makgolo tse telele, le dingolwa tsa dithuto tsa Daniele, le dintho tse jwalo, ba ne ba di bolokile.

³³ Mme seo ba neng ba se etsa, ha shwalane e tshwara, ba ne ba nyolohela Assay[?] Dithabeng. Mme hodimo mona ba ena le kastele. Mme kahara kastele ena ho e-na le kastele ya ba-bohlale. Mme ba tshware fujadous[?] mokete wa bona. Mme ka mora' mokete ba tswele tlasa marulelo, kapa matswapong, mme ba kene mono toreng ya tlhahlobo hoba letsatsi le dikele. Mme jwaloka ha Mahamede ba etsa ka tlwaelo, ba kgumamela letsatsi mme ba howeletse, "Allah! Allah!" Mme hangata ba ikgalaletse ka metsi a kgethehileng, le jwalo-jwalo, ho fihlela la kajeno. Hangata, hara ntho tsa bona tse halalelang ho feta, e le mollo. Ba ne ba dumela hobane Modimo o le mong wona le wa nnete o ne o ahile mollong.

³⁴ Mme ho makatsa hakakang ho tseba hobane Modimo o le mong le wa nnete o sa ntse o ahile Leseding, mme Ke Mollo o timeletsang.

³⁵ Kamoo ba neng ba besa mello e kgethehileng! Mme ba shebe mollo wona, hoba ba dumetse hore Modimo o le mong le wa nnete o ahile mollong wona, mme O ne a Ikgadimisetsa bona. Mme mollo o ne o tuka ka kganya e fetisang ka nako ha e—e lesedi la letsatsi le dikela.

³⁶ Mme ka hona ba tswele toreng ena ya tlhahlobo, mme ba lelale. Mme ba ne ba rupeletswe hantle. Mme ba tseba kgato e nngwe le e nngwe ya makgotlahadi a dinaledi tsa lehodimo. Ba sheba kgato e nngwe le e nngwe ka bokgabane.

³⁷ Oh, hola Bakreste ba ka etsa jwalo! E seng ho sheba dinaledi, empa ho sheba Lentswe la Modimo ha Le phuthuloha. Hola re ka e lemoha kajeno, mme ra bona kamoo Modimo a tshepisitseng letsatsing lena dintho tseo re di emelang ka bonatla bo bokana. Modimo o tshepisitse ho etsa dintho tsena, jwalo ka ho fodisa bakudi le ho etsa mehlolo e meholo.

³⁸ Yena Daniele ya ba rutileng ka ditaba, o boletse, ho re, “Matsatsing a bofelo batho ba tsebang Modimo wa bona ba tla hapa dikgapo.” Mangolo ao a tlamehile ho phethahatswa. Hola feela re ka batlisisa! Mme ha le ka lemoha, Modimo o Itshenolela feela ba batlisang le ba lakatsang ho Mmona. “Atamelang ho Nna, mme le Nna ke tla le atamela,” ho bolela Morena. Mme ka nako tse ding Modimo o dumella dintho ho hlaha re tle re Mo atamele. Hoba ruri Modimo o rerile hore ditaba tse itseng di tshwanetse ho hlaha, mme di tla phuthuloha feela kamoo tshupanako ya Hae e kgolo e otlang kateng.

³⁹ Mme hodima moo, re tla re, bosius bo itseng, hoba mokete o fele, le hoba ba kgumamele letsatsi le dikelang, moifo wa rona o nyoloha o kena toreng ena ya tlhahlobo. Mme yare ha makgotlahadi a lehodimo a qala a hlaha sebakeng, dingolwa tsa kgale tsa mehla ya kgale, tsa bahale, tsa nntshwa. Mme tsa phuthullwa, mme ba di sheba, mme ba re, oh, dintho tse itseng di ne di leptjwe. Mme temana, mohlomong, ya tswella nako e telele, malebana le ho kgehlemana ho hoholo ha mebuso, le ho putlama ha dipuso tsa bona tse kgolo, le kamoo maemo a setjhaba, le dintwa, di ileng tsa harola lefatshe mme tsa le todisa ka madi a balekane ba bona. Mme erekaha banna ba moyo ba utlwisia dintho tsa moyo feela; le kamoo ho phuthuloha ha matsatsi a maholo a fetileng ho hlahileng kateng, le sekgobo sa bona, nakong eo mollo o halalelang o lakomang o nyeka sebaka mme o ntoo nyamela, ho lekanya Modimo o le mong le wa nnete o phelang.

⁴⁰ Mme yare ha bosiu bo nanarela kgitla ya bona, ha re re, hora ya leshome kapa ya leshome le motso, yare lekgotla le sa dutse mono, mohlomong ba bina difela tsa bona, kapa mohlomong ba ntse ba rapela. Ha re tsebe feela seo ba neng ba se etsa, mme boranalane ha ba e hlakise. Empa, leha ho le jwalo, ba tshwanetse ba be ba ne ba dutse ka maikutlo a semoya, hoba Modimo o rapela moo bonngwe le moyo di leng teng.

⁴¹ Modimo o tla tla ho rona hoseng hona. O tla baballa bophelo ba moratuwanyana enwa wa ngwanana, le ba bangata ba lona mona mohlomong le bolawa ke mofetshe le ke mafu a mang, hola feela re ka kena bonngweng ba moyo le Lentswe la Hae le Yena. Modimo o tla Itshenola. O etsa jwalo kamehla.

⁴² Tseleng e yang Emmause, ka morao ho tsoho, ke feela mohla Theofile le motswalle wa hae ba qalang ba bua le Yena, mme ho qotswa le Mangolo, mme Modimo o ka ho Kreste wa Itshenolela

bona. Mme yaba tseleng e kgutlang, ba re, “Ana dipelo tsa rona di ne di sa tjhese ka ho rona ha A ntse a buisana le rona tseleng?” Ntho e nngwe e teng ka ho bua ka Lentswe!

⁴³ Mme dingolweng tsa bona tsa kgale, eitse ha ba bala ka ba-bohlale ba fapaneng ba seng ba iketse. Mme ha ke kgone ho qapodisa Bibele ya bona hona jwale, kapa ba ile ba bitsa Zedakoah[?], ntho e kang eo, eo ba e badileng mme ba lebisa morao mengolong ena ya banna ba bona ba kgethehileng. Le kamoo bongata ba bona e neng e le basebeletsi ba medimo ya bohata, mme ba dihela dihlong le maswabi hodima batho, ntle le pelaelo ba-bohlale ba ile ba inamisa dihlooho tsa bona ka tshwabو. Empa, le hona, le jwale mello e kgethehileng e tukang, e ne e lekanya Modimo wa nnete.

⁴⁴ Ke moo ke bonang kasteleng ho tswa, e mong ya tshwereng lengolo letsohong la hae. Mme o le hlahisa ho ditsebi di sa dutse hodima tora ya bohlahlobi, di shebile dinaledi, mme ntho ka nngwe e hata ka kutlwano e phethehileng, jwaloka ha e entse bosiu ka bosiu, jwalo feela kaha Modimo a e rerile.

⁴⁵ Mme ka mona, yare ba sa qoqa ka mebuso e wang, ba bala karolo ya Daniele, e itseng, “Ka tadima ho fihela lejwe le kgephoha thabeng, e se ka matsoho, mme la thesela mebuso ya lefatshe mme ya eba jwaloka—jwaloka mooko sehatelong. Mme lejwe le leholo lena la fetoha thaba e kgolo e tlalang lefatshe lohle. Mme mmuso wa Hae e tla ba mmuso o sa feleng.” Yaba ditshepo tsa bona di boela di hotetswa ke mohla mebuso ena e tla kgaotsa ho wa, le mohla mebuso e tla kgaotsa ho senngwa, hoba ho ne ho tla tla mmuso o sa feleng o kgethilweng ke Modimo o le mong o phelang le wa nnete.

⁴⁶ Mme yare ba sa nahanne dintho tsena, ka Mangolo, e mong o tshwanetse a ba ile a sheba hodimo. Mme keha e mong o sele a le hara tsona. Ba bona Lesedi leo ba sa kang ba le bona pele. E ne e le Naledi e mohlolo e neng eso, ho fihlela nako ena, e se setho, kapa e sa ka ya bonwa ke mahlo a ya-bohlale. Empa e ne e le teng mono. Hobaneng? Mangolo a tshwanetse ho phethahatswa.

⁴⁷ O re, ebe, “Moena Branham, o nahana hore Modimo a ka sebetsana le ba-bohlale bao?”

⁴⁸ Bibele e boletse, ho Baheberu kgaolo ya 1 le temana ya 1, ho re, “Modimo, mehleng ya boholoholo, le ka mekgwa e mengata,” ka mekgwa yohle e mengata, “O buile le bontate.”

⁴⁹ Ho bile ho ngodilwe ho Diketso 10:35, ho re, “Modimo ha o ye ka tshobotsi ya motho, empa O hlompha bao, ditjhaheng tsohle, ba lakatsang ho Mo sebeletsa ka ho loka.” Leha e ka ba o positse, feela, ka ho loka ho—ho tswang pelong ya hao o lakatsa ho sebeletsa Modimo, Modimo o tla hlompha seo. Ka hona, ha ho le jwalo, diphutheho tsa bodumedi di ke ke tsa

seha mela, e tla kgina Modimo tumelwaneng e itseng, hobane Modimo o tla sheba merero ya pelo ya motho, mme teng A sebetse ho qala lethebaneng leo.

⁵⁰ Mme re fumana hore ba-bohlale bana, ka botshepehi dipelong tsa bona mme ba ne ba lakatsa ho bona Modimo o le mong oo wa nnete, le ho shebella seporofeto sa Hae ho phethahala, se boletseng ho re, “Morena o tla Mo hlahisetsa le ho hloma...mmuso wa Hae o ke ke wa ba le bofelo. E tla ba mmuso o sa feleng.”

⁵¹ E ne e le ka nako eo ha Naledi, eo re e tsebang kajeno e bitswa Naledi, e hlaha dibakeng. Ekare ke a ba bona ba-bohlale bao, ba le kgopolo e le nngwe, ba se na puo ha ba sheba semaka sa Naledi e latotseng melao ya letsatsi le mahlahana a lona, mme e bitohile hara dinkgome tse kgolo tsa makgotla a lehodimo, ho tlaleha taba mohla e ne e le mothating wa ho etsahala.

⁵² Mme ke kgolwa lekgatheng lena le ka kgona ho bala pakeng tsa mela mme la tseba seo re se bolelang, hore tsatsing lena, Modimo o hanyeditse ntho e nngwe le e nngwe, ho Itlaleha, hore O a phela kajeno, o tsohile bafung, kahara Mmele wa Hae o moholo wa lehodimo. Setshwantsho sa Boleng ba Hae mona se tla hanyetsa mosadumele e mong le e mong lefatsheng. O phela ka mehla yohle. Modimo o sebetsa dintho ka tsela ya Hae ka Sebele, ka tse sa tlwaelwang.

⁵³ Empa, ba ne ba ile ba sheba masedi a lehodimo, empa Lesedi lena la bonahala le fapanle a mang wohle.

⁵⁴ Mme esale re shebile, kajeno, masedi a ka hara kereke. Esale re shebile Methodise, Baptise, Pentekosta, Presbeteriene, masedi.

⁵⁵ Empa ho ba Mo shebileng, eka Lesedi le fapaneng le qala le phatsima, le Mo tlaleha. “Esale Yena maobane, kajeno, le ka ho sa feleng.” Ka bottle ba Hae bo tlokomang le matla, ba Mmele wa lehodimo o rometsweng ka sebopeho sa Moya o Halalelang, matsatsing ana a ho qetela ho Kereke, ho tlaleha matla a tsoho ya Hae, mme Yena kamehla ke Lesedi la Bosafeleng le leng teng hara badumedi ba Hae jwale. Oh, ho babatseha hakakang ho bona seo A se etsang!

⁵⁶ Mme mono yare ba saeme, ba tsielehile, e mong a sa kgone ho buisa e mong, hoba kganya ya Lesedi lena e ne e ba tsieditse.

⁵⁷ Oh, ho tshwana hakakang le kajeno, motswalle wa ka ya fokolang ya fedileng matla, hore ha monna ya esong ho tsebe Matla a Hae, ho fana ka Lesedi le letjha le ho fana ka tshepo e ntjha, ha a kena ka pela Sefahleho sa Motho ya Mokgethwa Kreste, o tsietswa ke tumelo ya boholo ba Hae. Ha e tshwane le ho ya aletareng mme o neheletsa moreri letsoho la hao le

letona, hape ha e tshwane le ho kena letsheng ho kolobetswa, kapa ho ema ka kgetla hofafatswa. Ke ho kena Leseding leo o eso le bone pele. Ke ankora ya tumelo e Mokgethwa e bitsang ntho efe feela e kgahlano le Lentswe la Modimo eka hoja e ne e le siyo. Le kenya Bophelo bo botjha. Le fa ba shwang tshepo. Le fa bafokodi sebete. Le fodisa ba kulang. Le hlohonolofatsa bakgesuwa. Ho babatseha hakakang ho kena Leseding la Sefahleho sa Hae! E seng kgopolotaba. Le jwalo ha se ntho eo motho e mong feela ka nama, dikelellong tsa bona, a e qapileng. Empa, e tswa ka kotloloho pela Sefahleho sa Morena wa Kganya, Lesedi la Bosafeleng la Modimo o phelang.

⁵⁸ Ha ntho e etsahala, e ankora tshepo eo e ka ho wena, hore ho sa tsottelehe o ka kula hakae, hamamorao, ha ho thuse letho ruri leha Diabolosi a leka ho o leka ka ntho e kgahlano. E ankorilwe kamehla. Ho sa natse kamoo sera se ka etsang hore o leke ho phela bophelo bo fosahetseng, o ankorilwe kamehla, hoba o kena ka pela Sefahleho sa Hae, Leseding le Mokgethwa le fetotseng botho bo kahare le ho kenya nyakallo, lenyenenyene la pholoso, le ketemang pelong ya hao, leo lefatshe le sa tsebeng letho ka lona, hore o tlohile lefung ho kena Bophelong. Lefu le diriti tsa lona di o sirohile, mme o fetohile mmopuwa e motjha ha o kena Leseding lena le Mokgethwa.

⁵⁹ Yare ba-bohlale bao ba sa eme, ka tsieleho, ba sa shadimile Lesedi leo, qetellong ke utlwa e mong a re ho e mong, “Oh, ana lena ha se letshwao le kgabane la hobane ntho e mothating wa ho etsahala!”

⁶⁰ Kannete, kajeno, hape, ha re kena ka pela Sefahleho sa Morena Jesu, ke letshwao le Mokgethwa la hobane ntho e nngwe e mothating wa ho etsahala; ho Tla ha Hae labobedi ho kganyang ho atametse.

⁶¹ Mme eitse ha ba sheba, e mong ho e mong, mme ka mora nakwana... Ba E sheba, mohlomong, bosiu bohole. Kamoo E neng e bekenya! E shebahala e hlakile ho feta dinaledi tse ding. Ba bonahala ba sa kgone ho tlosa mahlo a bona ho Yona, ho sheba naledi e nngwe e sele.

⁶² Mme ke tiile, ha re bona Lesedi leo la Bosafeleng le leholo le tjhabela difahleho tsa rona, re ke ke ra sheba diphutheho tsa rona tsa bodumedi, ho re, “Re Baptise, kapa re Presbeteriene, kapa re Pentekosta,” kapa seo e ka bang sona. Re mpa re sheba Lesedi, mme re a phela. Yena ke Lesedi la Bosafeleng.

⁶³ Mme eitse ba sa E shebile, qetellong ha letsatsi le tjhaba... Ba robala letshehareng. Nkile ka ba shebella ba dutse diterateng tsa India, ba fapantse maoto, dihlooho tsa bona di thulane; jwaloka ha ba ye ba robale motshehare, mme bosiu ba tlohe ho ya sheba dinaledi, ba etse motsamao ofe feela hloko.

⁶⁴ Ke ba Mo lebeletseng feela ba tla Mmona. Ke ba dumelang ho Yena feela ba tla thabela mahlohonolo a Hae. Ke ba

dumelang phodisong feela ba tla fodiswa. Ke ba dumelang pholosong feela ba tla e amohela. Tsohle di ka etsetswa ba dumelang. Empa, pele, ha e a tshwanela ho ba mohopolo o qapilweng wa nama. E tshwanela ho ba tshenolo e tswang ho Modimo a nnotshi ka kotloloho, re sa ntse re shebile.

⁶⁵ Re fumana, bosiu ka mora bosiu, ba E shebile. Ba eletsana ka Yona. Ba sheba Mangolo, mme ba hlahloba. Ke bona ho kena e mong, le ho re, "Mongolo o mong wa Baheberu ke wona. O tswa ho ba bang ba baporofeta ba bona, ya bitswang Balaame. Mme a re, 'Naledi e tla tswa ho Jakobo.'" Mme ba bona ho phethahala ha Mangolo. Oh, kamoo dipelo tsa bona di ileng tsa nyakalla!

⁶⁶ Le kamoo e tlamehang ho nyakallisa dipelo tsa rona, ho tseba hobane tsatsing le lebe lena leo re phelang ho lona jwale, ho bona Mongolo o halalelang wa Modimo o phethahala le ho senoelwelwa rona e le Lesedi le le leholo le hlahlobang hodima botho ba rona.

⁶⁷ Yaba, ka mora nakwana, yare ba sa E shebile, ho a makatsa bosiu bo bong Ya qala ya tsamaya. Mme kamehla re tsamaya le Lesedi. Mme Lesedi la qala la tsamaela nqa bophirima. Ba belesa dikamele tsa bona ka leptlapotla le dikabelo tsohle tsa bona. Ba nka dimpho. Mme ekare kea ba bona ha ba kena leetong la bona, ba latetse Lesedi, hoba ba tsebile hore E ne e le Boleng ba lehodimo. Bo ne bo loketse ho hadimisa Lesedi le itseng le leholwanyane.

⁶⁸ Ho jwalo le kajeno, motswalle, ha re bona naledi e phatsima, re a tseba hobane ke kgadimiso ya letsatsi. Ha re bona kgwedi e phatsima, re a tseba hore ke kgadimiso ya lesedi le leholwanyane.

⁶⁹ Ha re bona kereke e phatsima, re a tseba ke kgadimiso ya Lesedi le leholwanyane, le sa shweng le Lesedi la Bosafeleng. Empa ha re irothofatsa, mme re sokolla dipelo tsa rona, mme re furalatsa tumelo ya rona, le ho re, "Matsatsi a mehlolo a fetile, mme ha ntho tse kang tsena haeba e le teng," re fa Lesedi la Modimo la Bosafeleng diholoholo tsa rona.

⁷⁰ Mme eitse ha ba phaila jwalo, ke ba bona ba tloha thabeng mme ba toba mangope a ka bophirima. Ba latela mangope ho theohela Nokeng ya Tigrise, mme mono ba sala Tigrise e matla morao ho fihlela ba kena tlase Babilona, ba tshela mohlanapa mane Eufrate, ho theoha jwalo, mme ba iphaphitha ka mafatshe a Palestina. Ka nyakallo! Ba tsamaya bosiu hoba ho phodile bosiu, ho tsamaya hara mahwatata. Ntho e nngwe, dinaledi di ne di tjhaba ha ho fifetse, ka hona ba ne ba lokela ho sala Lesedi morao. Mme Lesedi e le lesupatsela la bona.

⁷¹ Mme eitse ha ba nyoloha, qetellong Ya fihla Jerusalema. Empa, yare ha E thula Jerusalema, Ya tima. Ya nyamela ka tshohanyetso ha ba thulana le Jerusalema, hoba jwale ya eba nako ya bona ya ho tjhabisa Lesedi.

⁷² Le ho theoha hara diterata tse manyoka tsa metse e meholo eo e matahaneng mmoho, ho theoha le diterata tsa motsemoholo oo wa kgale wa lefatshe, mohlomong, Jerusalema; e kile ya eba terone ya Melkisedeke e moholo, wona oo baporofeta ba baholo ba mehleng le bangodi ba ngodileng haholo hakana ka wona. Empa ka baka la bophelo ba bona bo bohlaswa, ba nama, ba ho thibasela, ba bokgopo, Lesedi la Evangedi le ne le timme.

⁷³ Mme Baditjhaba e ne e le bana, kahara motse wa Bajuda, ba howeletsa, “O kae ya tswetsweng Morena wa Bajuda? Hoba re bone naledi ya Hae botjhabela mme re ttile ho Mo kgumamela.” Ke ketsahalo e hlollang hakae ya letsatsi lena, Oho Ntate ya mohau, ha re sheba mme re nahana! Bajuda ba kgalehile hona ho fihlela ba-bohlale, Baditjhaba ba botjhabela, ba tswile dinaheng tse hole, ba hahlautse ho fumana Morena wa Bajuda, keha ba sa tsebe letho la yona.

⁷⁴ Kajeno, Modimo o nkile monna ya sa rutehang, bashanyana le banana mohlomong ba se na le ho fetang thuto ya sekolo sa melao ya puo, ba hlahisitswe ke matla a Moya o Halalelang, a howeletsang ditsebeng tsa kereke, “O mona ka matla a Hae a maholo, ho Iphuthulla le ho tsebahatsa,” mme kereke ha e tsebe letho la yona.

⁷⁵ Ba ttile ho hlompha. Ba ttile ho tlota Morena wa marena. Mme kereke, borokong ba yona ba borapedi bo hlophilweng, ha e tsebe letho la Yona. Ke batho basele. Jwang, athe dibatana ke tsena di a thenthetsa, mephoso ya tsona ya botjhabatsatsi e leketla ho tsona, le ditjellane. Mme jwaloka ha Philone a kile a bua, “E ne e se marena, empa ba ne ba le—ba tshwanelwa ke boholo ba ho fuwa hlompho ya bamemuwa ba Morena.” Mme ke bana, ba kalletse diphoofolo tsena tse seriti, ha ba tsamaya diterateng, ba re, “O kae ya tswetsweng Morena wa Bajuda?” Bibele e boletse ho re, “Jerusalema yohle le Heroda ba tshoha.” Bopaki ba bona ba fuduha ntho e nngwe.

⁷⁶ Ana ha e nyarose kajeno, haele moo kereke e sa kgone ho phaphama bowatleng ba yona ba ditlhakiso tsa thutabomodimo, ho bona matla a Kreste ya phelang, ya tsohileng le Kganya ya Hae; e le motsamao o sa rutehang, o sa balang, o sa kgeseng diphutheho o kgahlolang lefatshe? Tloong le bone Kganya ya Modimo o phelang. Moya o Halalelang o tsholoha jwaloka ha O entse tshimolohong. Mangolo a tshwanela ho phethahala, mme ke ena e nakong ya qetelo.

⁷⁷ Mme yare ha ba-bohlale bana ba haola seterateng, ba fuduha ho qala ka morena ho isa ka molebedi, ka molaetsa wona, “O kae na? O hokae na?” Keha ba se na karabo. [Moena Branham o opa diatla tsa hae habedi—Mong.]

⁷⁸ Mme, kajeno, ha diseputiniki di haola dipakapakeng, ha dipontsho tsa tshenyeho e tletseng di le haufi; ha basadi le

banna ba itaha sebeng mme ba phela bokgopong, batho ba howeletsa, "Hona ho bolelang?" mme kereke ha ena karabo. E robetse e kgalehile.

⁷⁹ Empa Moya o Halalelang, Lesedi la Modimo le hlolehileng le la Bosafeleng, le teng mona ho tjhabela mang le mang ya ka kgonang le ya tla Le amohela.

⁸⁰ Lesedi le ne le nyametse. Ba ne ba fana ka bopaki ba bona. Mme qetellong ba bitsa Sanhedrine mmoho, e le pitsa ya lekgotla. Mme bahlalefi le baporofeta ba kena, ka moporofeta e monyenyan, moporofeta e monyenyan ya tlase, ya bitswang Mikea, boporofeta ba hae. Mme ba bolella morena, "Ho ngodilwe, 'Le wena Bethlehem, ana ha o monyenyan hara dikgosana tsohle tsa Juda? Empa ho tla tswa ho wena Motsamaisi ya tla busa setjhaba sa Ka, Iseraele.' Ka baka leo, e ka kgona ebe Bethlehem moo Kreste a tla tswallwa teng, Morena wa Bajuda."

⁸¹ Be, ho se motho ya ka ba bolellang kamoo ho uwang Bethlehem. Empa ba tsamaya ba tswa ka kgoro, mme, eitse ha ba siya motse wa lefifi, Lesedi la boela la ba hlahela. Naledi ya hlaha. Mme Bibele e itse, "Ba nyakalla ka thabo e kgolo haholo." Ba tshwanetse ba be ba ile ba howeletsa hanyenyan. Ba nyakalla ka thabo e kgolo haholo. Ba ne ba hloletswe. Bona... Naledi e ne e hlahile ho ba tsamaisa ho fihla mafellong a leeto la bona.

⁸² Ba E sala morao. Jwale ba lemoha hobane E ne e leketla tlase ho feta kamoo E ne e le kateng pele. E batla e le haufi ho feta jwale. Mme qetellong eitse ha... Ba tsamaya jwalo, ba nyakaletse mme ba boka Modimo, hara bosiu, ba tsamaiswa ke letsoho la Morena. Empa qetellong Naledi ya fihla setaleng se senyenyan, sona e le sebakanyana se mosikong wa leralla, lehaha, mme teng Naledi ya phomola hodima lehaha. Mme ba-bohlale bana ba matla, leetong la bona le fetang selemo le dikgwedi tse tsheletseng, tseleng ya bona, ba hahlaula, ba shebile, ba sa latela letho nqa eselesa ha e se Naledi. Mme eitse ha E phomola, ba kena ka hare mme teng ba fumana lesea, Josefa le Maria. Mme ba ntsha dimpho makeseng a matlotlong a bona. Ba Mo nyehela, gauta, dibano le mirra.

Hola feels re ena le nako! Ha re kgefutseng motsotso.

⁸³ Gauta e ne e lekanyang? E ne e le Morena. O ne a sa tlo etswa Morena; O tswetswe e le Morena. E ne e le Morena wa Modimo wa Bosafeleng. E ne e le Morena, ka hona ba Mo nyehela gauta.

⁸⁴ Mme ba nyehela dibano. Ke monkowane oo, o theko e thata haholo, o kgabane o ka fumanwang. Dibano di ne di bolelang, monkowane? E ne e le senoko se monko-monate ho Modimo, hoba O ile a tsamaya hohle a fodisa ba kulang mme a etsa hantle. Gauta, hobane E ne e le Morena. Dibano, hobane E ne

e le senoko se monko-monate ho Modimo. Bophelo ba Hae ba Mo kgahlisa hona, hoo Modimo o bileng wa budulela kgalalelo ya Wona le botle, hoba e ne e le kgalalelo ya Wona ka Sebele e hadimiswang ho Yena.

⁸⁵ Oh, hola re ka ba senoko se monko-monate, hola kgalalelo ya Modimo e be e ka hadimiswa ka ho rona; ho fihlela re tsamaya hohle re etsa ho lokileng, jwaloka Jesu wa Nazaretha, ho fihlela eba senonetso se monko-monate ho Morena.

⁸⁶ Empa, re pheha kgang, re a nganga, re a kolokotjhana, re a belaela, ke ka hona e-bang lephoka le lebe dinkong tsa Modimo. Maphelo a rona a ne a kene mme a tswa dibakeng tsa kgale tseo re neng re sa lokela ho ba ho tsona. Re bua dintho tseo re sa lokelang ho di bua. Re etsa dintho tseo re sa lokelang ho di etsa. Re pheha kgang mme re nka lehlakore le lefatshe, le ho latola Kreste metsotsong e kgolo e mahlonoko. Ke ka baka leo re sa beng senoko se monko-monate.

Empa, Yena a le jwalo, mme ba-bohlale bana ba nyehelane ka dibano.

⁸⁷ Jwale ba Mo file mirra, hape. Mme mang le mang o tseba mirra o le theko-thata empa ke setlama se babang. Mirra, mirra o no o lekanyang? Ke sehlabelo sa boholo bo phahameng. Bophelo ba Hae bo sitsweng, bo botjha, mane Kalvari, moo dibe tsa lefatshe di Mo silakantseng maqhetswana. Gauta, hobane ke Morena. Dibano, tsa bophelo ba Hae bo mosa, bo tletseng lerato. Le mirra, ka baka la sehlabelo sa Hae ho baetsadibe, boo A bo shweleng. “Mono a tetekwa ka baka la makgopo a rona, athe o hlabeteswe dibe tsa rona. Kotlo e re tlisetsang kgotso e Mo wetse hodimo, mme re fodisitswe ke maqeba a Hae.” Ke baka leo ba Mo nyehetseng mirra.

⁸⁸ Yare ha ba lemositswe ke Modimo ka toro, ba ikela ka tsela ese. Ha ba ka ba kgutla, empa la bona—la bona leeto le ne le fedile. Naledi e ne e qetile sebaka sa Yona.

⁸⁹ Naledi e bolelang ho rona, kajeno, motswalle? Daniele o re fa karabo, Daniele 12:3. E itse, “Ba hlalefileng mme ba tseba Modimo wa bona ba tla kganya jwaloka kganya tsa lehodimo; mme ba kgannetseng ba bangata ho lokeng ba kganye jwaloka dinaledi kamehla le mehla.”

⁹⁰ Rona re eng, kajeno, he? Re dinaledi. Mokreste e mong le e mong ya tswetsweng labobedi ke paki ya Morena Jesu Kreste, naledi e lokelang ho hadimisa matla le kgalalelo ya Morena Jesu; ho Mo hadimisa bophelong ba hae; ho mo phethahatsa polelong ya hae, ho mo phethahatsa matleng a hae a fodisang, ho mo phethahatsa tsohong ya hae; ho Mo hadimisa ka mekgwa yohle eo A na hadimisitswe ho rona ke Modimo Ntate. Re dinaledi.

⁹¹ Ela hloko! O lokela ho ba naledi ya mofuta ofe? Naledi ena e ne e sa tsamaiswe ke matla a Yona ka sebele. E ne e

tsamaiswa ke matla a lehodimo a Modimo o Matlawohle. Mme efela ha eba re tla hadimisa baetsadibe ho Kreste, re tlameha ho tsamaiswa ke Moya o Halalelang. Baroma 8:1, e itse, “Ha ho sa le tsuo jwale ho ba leng ho Kreste, ba sa tsamayeng ka nama ba mpa ba tsamaya ka Moya.” Hore re be naledi, ho hadimisa Lesedi la Kreste, ho tlisa baetsadibe ho Yena, re tlameha ho tsamaiswa ke Moya o Halalelang. Ka nepo!

⁹² Mme re ke ke ra ba ntho e tlwaelehileng. Re tlameha ho ba ntho e sa tlwaelehang. Re ke ke ra tlwaeleha, hoba batho ba Modimo ke batho ba ikgethileng. Esale ba le jwalo, le mengwaheng.

⁹³ Leha e ikgethile, empa naledi e ne e hlakile. E sa hlaka ka thuto ya lefatshe, ditaba tsa lefatshe, empa e hlakile jwaloka sehlabelo pela Morena. Re namalla, jwaloka ha ba-bohlale ba entse ka pela Sefahleho sa Morena wa marena, ho hadimisa Lesedi la Hae.

⁹⁴ O naledi. Mokreste e mong le e mong ke naledi, ho tsamaisa ba lahlehileng, ho tsamaisa ba imetsweng, leoto la motsamai, ho bao ba batlang. Ke moo, naledi e ke keng ya itsamaisa, e lokela ho tsamaiswa ke Moya. E tshwanela ho hadimisa kganya ya Modimo bophelong ba yona, ho itima dintho tsa lefatshe, le ho phela ka borapedi le ka phadimeho bophelong bona ba jwale. E tshwanela ho hadimisa Lesedi la Moholo wa yona ya tjhabileng.

⁹⁵ Re lokela ho etsang he? Ho tsoha, le ho tjhabisa Lesedi la Modimo ho ba shwang. Bodibeng bo lefifi ba lefatshe lena, re lokela ho hadimisa le ho tjhabisa Sefahleho sa Morena Jesu ka matla a tsoha ya Hae. Jwaloka ha ebile Yena maobane, esale Yena kajeno, ho Mo hadimisa.

⁹⁶ Empa hopola, he, Naledi, hape, hoba e qete morero wa yona, ha e inkele tlota. Naledi e mpile ya fihlisa banna mafinyellong a bona, le ho ba bontsha Lesedi leo le phethahetseng.

⁹⁷ Mme rona, jwaleka ditho tsa Mmele wa Kreste, hoseng hona, metswalle, re masedi a Modimo, empa ha re ithuele tlota. Hoba re fumane wa rona—wa rona mokudi, le wa rona—wa rona... motho eo re mo tataisang; ha re se re ba fumane, re tshwanela ho itlhohlolla tlota mme re ba tataisetse ho “Lesedi le leholo le le phethehileng le tjhabileng, ho bonesa tsela ya motho ka mong ya fihlang lefatsheng,” Morena Jesu Kreste. E seng kgopolo-taba e bitswang Santa Clause, e seng kereke e itseng ka bodumedi bo hlophilweng; empa Lesedi leo la nnete le le phethahetseng, Jesu Kreste, Mora Modimo o phelang.

Ha re rape leng.

⁹⁸ Ka dihloho tse inametseng leroleng moo Modimo a o ntshitseng teng; ka tsatsi le leng, ruri jwaloka ha dinaledi di tjhaba bosiu, le letsatsi le tjhaba motshehare, o tlilo kgutlela

leroleng. Ha o le teng mona, manalela ana a Keresemose ena, mme o lakatsa ho ba le Moya o Halalelang ho o tataisetsa ho Mopholosi, le ho Mo amohela ka mokgwa o jwalo, na o ka Mo phahamisetsa letsoho la hao le ho re, "Modimo, nkgauhele. Kgantsha tsela yaka ke sa tsamaya letsatsi ka leng. Mme o ntataise, qetellong, o nkise Leseding leo le phethahetseng, hore bophelo ba ka bo tle bo nyalane le ba Hae mme ke fumane Lesedi le hloleheng, la Bosafeleng."

⁹⁹ Morena a o hlohonolofatse, kgaitsetsi ya ka e ratehang; le wena, kgaitsetsi ya ka; wena, moena wa ka; wena morao mono, moena; le wena, kgaitsetsi; le wena, moena wa ka. Modimo o bona matsoho a lona. Oh, wena kgaitsetsi, Morena o a o bona. E, ka mona, mofumahadi, Morena o a o bona, ehlile.

¹⁰⁰ "Oho Jesu, romela Moya o Halalelang hoseng hona, tataisa bophelo ba ka bo fokolang ba hlahlathelang. Ke mathile ka ikgomathisa kerekeng e nngwe; ka ba Mokatolike, ka ntoo ba Mobaptise, ka ntoo ba Mopresbeteriene. Ka ya Pentekosta. Ke ile hohle. Mme ke fumane, Morena, hore ke—ke ipotsa feela; ha ke tsebe moo ke emeng. Empa ere Mmele oo wa lehodimo, ere Boleng boo ba Mphatlalatsane ya lehodimo, Moya wa Modimo o moholo, kajeno o ntataisetse sebakeng se ka ho Yena moo ke batlang ho ba hona teng, moo nka fetolang pelo yaka sejelo mme ka sikara Eo; A tle a ntataise hara meriti yohle, dikgohlong tsa meriti ya lefu, ke tle ke se ke ka tshoha letho mohla ke tsamayang tseleng eo."

¹⁰¹ Ho ka ba le e mong pejana ho kwalwa? Modimo a o hlohonolofatse, monghadi; le wena, monghadi; le wena, monghadi. E, eo ebile nako e kgolo ya banna, monghadi. Ba bang boholo ebile mosadi; kgetlong lena ke banna ba neng ba phahamisitse matsoho bona. Ehlile, ke banna ba bohlale ba tlileng, ba batla, ba setse Lesedi morao. Modimo o batla wena. Mothwana Mar- . . .

¹⁰² Mothwana Maria le Josefa ba ne ba kene motseng, mme teng Jesu a tswalwa. Ka yona nako eo ha fihla ba-bohlale, ba tlile ba tsamaya tsela e telele, empa qetellong ba fihlela sehlohlolo sa bona se seholo, Naledi e ile ya ba tataisa. Jwale haesale o batlile ho ba Mokreste ka nako e telele, mohlomong wa nka leeto le le lelele. Sena ke sehlohlolo hoseng hona, mohlomong, hoba jwale o tlilo Mo amohela e le Mopholosi wa hao o sa ntse o Mo sikara pelong ya hao. Hang hape, pele re kwala memo ena ya aletare? Morena a o hlohonolofatse. Hantle haholo. Ke a o leboha.

¹⁰³ Mme jwale ba bakae ka mona ba ka reng, "Oho Morena, jwalo ka ha ke boleletswe ke Mangolo, wona a ke keng a hloleheng, hore ho mirra wona o abetsweng Wena, mono ho ne ho bapisitswe, ho tshollwa ha bophelo ba Hao. 'Wa na wa tetekwa ka baka la makgopo a rona, re fodisitswe ka maqeba

a Hao.' Wa na wa sotlwa ke ditjhapo tse sehloho sefateng sa tjhapo, re tle re fodiswe ke metopa ya Hao. Ke hloka matla a Hao a fodisang, kajeno, Morena. Ana O ka tlosa dipelaelo tsohle bophelong ba ka? E tlose ho nna, ke se hlole ke belaela. Mme nke ke tle ho Wena ka boikokobetso, hona jwale, le ho O dumela bakeng sa phodiso ya ka."

¹⁰⁴ Na o ka phahamisa letsoho la hao, hore, lona batho ba kulang? Morena a o fe tlhoko ya hao, motswalle wa ka ya ratehang.

¹⁰⁵ Na o ka Mo belaela? Ruri lekgale. Kajeno O eme e le Ngwana Botjhabela kapa...e le-e le Ngwana Keresemose, Mora Modimo, Rabokgoni-bohle. O phethisa tlhoko ka nngwe. O phethisa tabatabelo ka nngwe eo o e hlokang. Ako Mo amohele. Re laelwa ho etsang ka hara Bibebe? "Beang matsoho hodima ba kulang mme ba tla fola."

¹⁰⁶ Jwale, Ntate ya Mahodimong, ke tlisa ho Wena sehlotschwana sena sa batho seo O se ntshitseng hoseng hona ho utlwa Molaetsa wa Naledi. Kamoo O sebetsanang le batho ba mehlahlwe yohle ya bophelo! O sebetsana le semokolara sa jwala. O sebetsana le lehlena. O sebetsana le rasaense. O sebetsana le malelapa. O sebetsana le moreri. O sebetsana le setho sa kereke. O Modimo. O moholo hoo ho seng ya ka O balehelang. Mme bao ba tshepehang pelong tsa bona, O ke o hauhele ba ditjhaba tsohle le ba ditumelo tsohle.

¹⁰⁷ Ka hona re O leboha ka bao ba phamisitseng matsoho a bona hoseng hona, ba ka etsang mashome a mabedi kapa a mararo, nka lekanya jwalo. Mme ke a rapela, Modimo, hore motsotsong wona, hona jwale, Lesedi le leholo la Bosafeleng le la bohloleho le tle le phunyeletse hodima moya wa bona, ba tle ba fumane phomolo ya kelello esale ba e batla le ho e labalabel, ka ho ikgomahanya dikerekeng le-le ka ho etsa ditshebeletso tse ikgethang. Empa Moya o Halalelang o ke o ba tjhabele.

¹⁰⁸ Jwaloka ha Esaia a boletse, "Batho bana ba ne ba dutse lefifing le letsho-letsho, empa Lesedi le leholo le ba tjhabetse." Etsa, Morena, hore kajeno ho phethahatswe dipelong tsena tse O lakatsang seporofeto sena. Ba fe kgotso eo e hlolang kutlwisiso yohle, mme e ba abele kgotsofalo e phethahatseng ya hobane ba kopane le Wena le ho buisana le Wena, le ho O neela maphelo a bona, a pshatlilweng ka hohle mme a robehile; hore Wena, ka gauta ya Hao, dibano le mirra, o ba fodise le ho ba etsa batho, dipsita tse bokwang tsa kganya ya Hao ka Sebele. Fana ka sena, Morena.

¹⁰⁹ Mme jwale molemong wa ba kulang le ba hlokofetseng, taelo e teng eo O re neileng yona, hore re tlamehile ho rapela le ho ba bea matsoho. Mme O buile, mantswa a ho qetela a tswileng melomong ya Hao e theko e thata, "Eyang ka lefatshe

lohle le bolele Evangedi. Mehlolo e tla tsamaya le ba dumelang ke yona ena; mme ha ba Bea matsoho a bona hodima ba kulang, ba tla fola.”

¹¹⁰ Re tseba e mong, moratuwa ya robetseng mona wa ngwanana, ya fofisitsweng ke baratuwa ba tshepehang ho tswa Florida, mme o maemong a hlobaetsang hona jwale. Hodima, bahlanka ba Hao ba bangata ba rapetse. Mme—mme dingaka tse ngata tsa na tsa sheba mme tsa tsokotsa dihloho tsa tsona, le ho re, “Ha ho sa tla ba le letho.” Empa ke thabile ha mmenyana, le bao ba tsotellang, ba sa ikanelo ho amohela hono e le karabo. Ba ikemiseditse ho bona ho phikolositswe lejwe ka leng. Ha ba ka fumana mohau ho Modimo o phelang, moratuwanyana wa bona ngwana wa bona o tla fola, mme o tla phela. Oh, fana ka sena, Morena, hammoho le ho ba bang ba dutseng mona.

¹¹¹ Bongata bo dutse mona hoseng hona, ba ka ema ba ntsha bopaki jwaloka ha ba-bohlale ba entse, “Re bone naledi ya Hae botjhabela.” Bongata bo ka ema ba re, “Re latswitse ho loka ha Hae, mme re utlwile matla a Hae a phekolang,” a ileng a tlosa mebeleng ya bona, mofetshe, le mahlo a foufetseng, le ditho tse qhwadileng, le mafu a mefuta yohle. Mme re howa dithoriso tsa Hae, ka lentswe lohle la rona, hara ditjhaba, Morena.

¹¹² E re bana, hoseng hona, bana ba Hao ba leng mona kajeno jwale, ebe banka-kabelo jwalo mahlohonolong a Hae. Re sa phethisa tsa bolebedi ba rona jwaloka bareri, ho rapela le ho ba Bea matsoho, aba, Morena, hore ba tle ba fole ka Lebitso la Mora wa Hao, Morena Jesu, Ya itseng, “Kopang sohle ho Ntate ka Lebitso la Ka, Ke tla se etsa.” Re ka e belaela jwang, ha eba Modimo a e boletse? Ruri jwaloka ha diporofeto tseo tsa Daniele di ne di tlameha ho phethahatswa, ruri jwaloka ha Modimo o phela, Lentswe ka leng le tlamehile ho phethahatswa. Mme ke O rapela ho e abela kganya ya Hae. Amen.

¹¹³ Ke tumelo ya ka e ithobileng ka ho fetisa, le botshepehi le ho loka ha pelo ya ka, hore ha banna le basadi ka ntle mono lona ba phahamisitseng matsoho a lona ho amohela Morena Jesu e le Mopholosi wa hao...Ke tseba e le temalo ho tlisa batho aletareng. Hoo ho itoketse. Ha ke na letho kgahlano le yona. Empa ho tla aletareng, o ka etsa ntho e le nngwe feela, yona, ke ho bolella Modimo hore o leboha ha A o pholositse. Hobane, motsotsong oo o tiisang seo o se bolelang, ha o phahamisa matsoho a hao, Modimo o o amohela ho latela bopaki ba hao hona moo. O latotse melao ya kgohedi, jwalo feela kaha Naledi e latotse melao ya letsatsi le mahlahana a lona.

¹¹⁴ Letsatsi le mahlahana di tsamaya ka tatelano. Le tlamehile ho tsamaya jwalo. Empa Naledi ena e latotse hoo, ya feta hodima yona yohle, hoba Modimo e ne e le wona o tataisang.

¹¹⁵ Kajeno tatelano ya kamehla e re boholo ba lona mona bo tlameha ho shwa. Ngaka e entse sohle se bokgonging ba yona. Ke hantle. Empa Moya wa Modimo o phelang o latotse hoo, ho re, “Ke tla o tshedisa.” Ha se, mohlomong e ke ke ya etsahala ka motsotsvana. Ba ile ba mamella, eka hoja ba bona Eo ya sa bonweng. Abrahama o na etsetswe tshepiso, mme a ema dilemo tse mashome a mabedi a metso e mehlano pele e hlaha, empa a hwanta a tswelapele mme a bitsa ntho tsohle tse kgahlano le tshepiso eka hoja di le siyo.

¹¹⁶ Nke ke ka ema mona manalela ana a Kresemose mme ka bua dintho tsena pela sehlotsvana sena sa batho hola ke sa tsebe hore ke bua ho tswa kae.

¹¹⁷ Maobane, mosadi a ka ba teng mona, lebitso la hae ke Mof. Wright. Na o teng mona, ho tswa New Albany, Mof. Wright? Bongata ba lona le ka mo tseba. Yena, ke a kgolwa, ke mosadi ya tsejwang haholo New Albany. Tshebeletsong ya ho qetela ya phodiso mona, moo... ke ne ke sa tsebe; e ne e le tlasa temoho ya moya. [Sekgeo lebanteng—Mong.]

¹¹⁸ Sontaha se tl Lang bosiu, ha Morena a rata, re ka leka temoho ya meya. Re ke ke ra e tshwara Sontaha hoseng, hantle, hoba le bone hoseng ha Sontaha se fetileng, vekeng, se hlahileng. Le a bona, batho ha ba fihle mona ka nako ho ema moleng, le jwalo-jwalo, hoseng, hoba le tlameha ho hlatswa dijana tsa lona, le jwalo-jwalo. Empa, ka Sontaha bosiu, re tla e leka mohlomong Sontaha se tl Lang bosiu, ha Morena a rata.

¹¹⁹ Yare temoho ya meya e sa tsweletse, ke batla ho qotsa ketsahalo e le nngwe feela, hang hoba ke le phethale tsa Mof. Wright.

¹²⁰ O na a sa kgone ho fihla mona. Dingaka tsa New Albany, nka bitsa mabitso a tsona, empa mohlomong ha se bohlale ho etsa jwalo, hoba hangata ha ba batle, ha o etsa jwalo. Re leka ho phela ka kgotso le batho bohole, kamoo ho kgonehang.

¹²¹ Mme re rata dingaka tsa rona. Dingaka, mohlomong, di dutse mona hoseng hona. Ke na le metswalle e mengata ya dingaka, banna ba lokileng, banna ba Bakreste ba tshepang Modimo. Ha se bafodisi; empa e le batho feela. Mme seo ba ka se etsang, nameng, ba ye ba se etse. Ba mpa ba thusa tlhaho. Ha ba...Ba lolamisa lesapo; ba tlose tshitiso tseleng, ntho e kang eo. Empa Modimo o tlameha ho bopa disele. Modimo ke Wona feela o ka fodisang, kapa—kapa wa medisa mesifa; ha ho moriana o ka etsang hoo.

¹²² Jwale, mosadi enwa o na e na le lehlwele la madi pelong ya hae. A le kwana dilemong tsa hae tsa bo mashome a tsheletseng. A topile habohloko ho fihlela a ekeditse boholo ba hae ba tlwaelo. Mme ba letsa mohaleng, mme mosadi wa ka a mpiletsha mohaleng, le ho re, “Billy, ba...mosadi e mong o batla ho bua le wena, kwana New Albany.”

¹²³ Ka re, “Be, kgaitse, tloo, hoseng hona. Re tlilo tshwara tshebeletso ya phodiso hodimo tabernakeleng.”

¹²⁴ A re, “Moena wa ka ya ratehang,” a re, “eka nka be ke kgona ho mo tlisa, empa ha a kgone le ho sisinyeha.” Le ho re, “O a shwa hona jwale.” Le ho re, “Ha ho tshepo bakeng sa hae.” Le ho re, “Re utlwetse ka dintho tse kgolo tseo Modimo a di entseng ka dithapelo tsa hao. Na o ke wa mo rapella? Na o tla tla?”

¹²⁵ Ka re, “Nke ke ka tla. Empa ana o ka bea mohala tsebeng ya hae?”

¹²⁶ A re, “Ke a kgolwa nka atametsa moalo wa hae.” Yaba o atametsa moalo wa hae, mme a fihlisa mosadi; a batla a sa kgone ho bua.

¹²⁷ Ka re, “Ha o ka dumela!” Tumelo ke kgodiso ya dintho tse lebeletsweng. E seng seo o se nahangan feela; empa seo o hlileng o se tsebang. Tumelo ke . . .

¹²⁸ Ke boletse Sontaha se seng, “Hola ke ne ke bolawa ke tlala, mme ke kopa . . .” Senkgwa se le seng sa bohobe se ka pholosa bophelo ba ka, mme o ntoo mpha disente tse mashome a mabedi a metso e mehlano; ke ne ke tla nyakalla eka hoja ke fumane bohobe, hobane ho na le bohobe bo bongata.

¹²⁹ Mme ho na le matla a mangata a ho fodisa. “Ha o ka dumela,” tseo ke disente tse mashome a mabedi a metso e mehlano; nka nyakalla. Hobane, mohlomong bohobe bo hole le nna ka dimaele tse leshome, empa, ha ke tshwere disente tse mashome a mabedi le metso e mehlano, tumelo ke kgodiso ya dintho tse lebeletsweng. Ke thabetse disente tseo tse mashome a mabedi a metso e mehlano eka hoja ke ntse ke ja bohobe, leha kwana ke tlameha ho tsamaya leeto le le lelele; ho qaputsa hara matsha, le ho parola matswapo, le ho tlola dikooqo, le ho feta hara mofero wa meutlwa, le ho hlwa leralla. Nka eketsa ho lapa ho feta ka dinako tsohle, ka ba ka huleha mesifa; ke lapile haholo. Empa ke tla nyakalla ka dinako tsohle, hobane ke tshwere disente tse mashome a mabedi a metso e mehlano, theko ya senkgwa sa bohobe, ho sa tsotelehe seo maemo a leng sona.

¹³⁰ Abrahama o ile a nyakalla dilemo tse mashome a mabedi a metso e mehlano, a tshwere tumelo pelong ya hae hore Modimo o kgona ka ho fetisisa ho phethisa seo A se tshepisitseng. Mme o bile a fumana seo a se kopileng.

¹³¹ Moratuwa ya ratehang mono, kgaitse. Ho sa tsotelehe mabaka ke afe, nka disente tseo tse mashome a mabedi a metso e mehlano, tumelo eo, t-u-m-e-l-o. Tshwara hoo matsohong a hao, e fupare pelong ya hao, ho re, “Ho sa natse se etsahalang . . .” Jwale o ke ke wa etsa mokana-o-dumela. O tlameha ho dumela ka nnate. “Ngwana wa ka o tla phela, hoba ka pelong ya ka . . . Modimo o entse tshepiso,

mme ke na le tumelo ho ya e dumela.” Mme ntho e nngwe esele e fetoha lefeela. Le a bona? Modimo o e tataisetsa e—e sedikadikweng seo.

¹³² Mosadi o ntetseditse maobane. Ba bang ba bona ba arabile mohala; a sa batle ho o amohela. Mosadi wa ka a ya mohaleng; a sa batle ho o amohela. A batla ho bua le nna. A re, “Moena Branham, ke rorisa lebitso la hao.”

Ka re, “Lebitso la ka? O etsa jwalo ka lebaka lefe?”

A re, “Oh, hola feela o ka mpona!”

Ka re, “Boka Modimo he, Ke Yena Ya entseng hoo.”

¹³³ A re, “Dingaka ha di fumane le leqhetswana la lehlwele leo la madi. Le hasakane le nyametse. Mme ke boetse setlwaeding, ke tsamaya hohle ke atlehile mmeleng, katileho e kgabane ka ho feta eo nkileng ka e bona dilemong.” Lebitso la hae ke Mof. Wright. Jwale o dula... O mpoleletse lebitso la hae la pele. Kae-kae New Albany, ha ke tsebe hona jwale feela.

¹³⁴ Tlasa temoho ya moya, Sontaha se fetileng, e ne e le veke, ke eme mona, ka re, “Ha ke batle bafe feela ba bomphato ba Tabernakele. Ke batla bao e seng ditho tsa Tabernakele. A Moya o Halalelang o ke o bue.” Empa ka mokgwa wa horeng, motsheo kwana ka mona kapa ka mane, ha ba le thaka le bitswang Hickerson, rona bohole re tseba Moena Hickerson. Ke kgau ya sebele ya nnete ya mohau wa Modimo. Mme o ne a kgohletse tlasa batho ba bang. Ke bile ke sa mo tsebe. Empa Moya o Halalelang o no o e rerile yohle. O ne a hlwedisitse ka sephaka sa monna e mong, a dutse morao mono, mme ke sa mo tsebe hore e ne e le mang.

¹³⁵ Mme ka re, “Thaka le le nyenyane le ntjhebileng, le hlwedisitse ka sephaka sa monna yane. O ntse a rapella moratuwa, ke a kgolwa, moena kapa sebare, kapa ho hong, ya neng a le tulong ya ba sa itekanelang; kelello e lahlehile, mme tshepo ya hae ya ho hlaphohelwa e fedile.” Mme Wa re, “HO RIAŁO MORENA. O tla hlaphohelwa.” Mme thaka le le nyenyane leo la e dumela, empa ha ke a ka ka tseba letho ka yona matsatsi a mmalwa hamorao.

¹³⁶ Mme maobane ba mo holotse tulong ya ba sa itekanelang kwana Kentucky, e le, “monna ya phethahetseng, ya setlwaeding, ya phetseng.” Le moenanyana wa rona wa moreri wa Methodise, Moena Collins, kgau e nngwe ya mohau wa Modimo. A ka ba teng mona hoseng hona. Bobedi ba bona, kaofela ha bona, ba ka teng mona. O tlide ha ka bosiu bo fetileng, le Moena Palmer ho tswa Georgia, mme a ntse a phetha hore moshanyana enwa o ile a feta, tseleng ya hae e yang Louisville, hoba a lokollwe tulong ya ba sa itekanelang. O pholohile, hape, mme a theoha ho ya lokisa diphosoz tsolah tsa hae tseo a di entseng; kgau. Mohau wa Modimo wa bohloleho!

¹³⁷ Ke Yena maobane, kajeno, le ka ho sa feleng. O se dumelle sera ho o qhekanyetsa. Lesedi la bohloleho Le tjhabile; Lesedi leo la bohloleho ke Jesu Kreste, Mora Modimo. Dumela ho Yena. Ako e ankore pelong ya hao. Ako e amohele e le tumelo.

¹³⁸ Ha re rape leng mme re tsebe, ho le bea matsoho, re ntse re le tlotsa ka oli, shebang seo Modimo a tla se etsa, ho sa natswe maemo.

¹³⁹ Jesu o boletse, ho Mareka 11:24. O itse, “Ha o ka re ho thaba ena, ‘Sutha mme o itihele lewatleng,’ mme o sa belaele pelong ya hao, o mpa o dumela seo o se boletseng se tla etsahala, o tla fumana seo o se buang.”

¹⁴⁰ Jwale e re ke qotse tlotlontswe, yona ke Segerike sa mantlha. E baleha tjena. “Ha o ka re ho thaba ena, ‘Koqoha mme o lahlelwé lewatleng,’ mme o sa belaele pelong ya hao, o mpa o dumela seo o se boletseng hobane se a etsahala, o ka fumana seo o se buang.”

¹⁴¹ Ha o itse, “Thaba, sutha,” mme e ntse e dutse mono, o re, “Be, ha e a etsahala”? Oh, e etsahetse. Ha o itse, “Thaba, sutha,” e ka ba ho suthile thojana e le nngwe e tshesane ya lehlabathe, ho tse makgolo a dibilione le dibilione tsa ditono. Thojana e le nngwe e suthile, empa e se e qadile ho etsahala. Boloka tumelo eo mme o shebe ha thaba eo e nyamela. Ruri.

¹⁴² Ha o re pelong ya hao, “Bolwetse, sutha ngwaneng wa ka. Bolwetse, sutha mmeleng wa ka, ka Lebitso la Morena Jesu,” mme o sa belaele. Hantle hona mono dikokwana tse molemo di se di hlomela ka dihlomo tse ntjha le ka sebetsa se setjha, mme sera se qala se tjhetjha ka santhao. O hlotswé hobane Kreste, ka ho nwa mirra wa Hae Kalvari, o hlotse Diabolosi le matla a mang le a mang a hae. Mme O mo hlobodisitse ntho ka nngwe a na e ruile, mme ha se letho ke setshosa; a ka tswelapele ka yona, o tla e etsa.

¹⁴³ Re ikemiseditse, ka mohau wa Modimo, ho bolela Evangedi le ho hadimisa Lesedi la Hae ho fihlela A kgutla.

¹⁴⁴ Jwale, Morena, tsohle di itshetlehile ho Wena. Jwale re tla bitsa batho bana, mme Moya o Halalelang o ke o tle tabernakeleng e nyenyane ena mme o bope tumelo ka pelong e nngwe le e nngwe, ba sa ema ba feta mona ho rapellwa. Ba ke ba tlohe kajeno mme ba etsise banna ba bohlale bao; mohla ba boelang ba bona Naledi, ka mora lekgatthe la lefifi, ba nyakkalla ka thabo e kholo haholo; le batho bana le bona, ba etse jwalo ha ba tlotswa mme ba rapellwa. Jakobo o boletse, Evangeding, “Bitsa baholo mme ba ba tlotsa ka oli ba ba rapelle. Thapelo ya tumelo e tla pholosa mobabi.” Batho ba ke ba nyakkalle ka thabo e kgolo haholo, ka ho tseba hobane tumelo ya Modimo e phunyeleditse dipelong tsa bona, mme ba tla fumana seo ba se kopang.

¹⁴⁵ Jwale, Ntate, O phethile karolo ya Hao. Ke entse sohle kamoo ke tsebang, ntle le ho bea matsoho hodima batho

le ho ba tlotsa. Jwale tse ding tsohle e tla ba tsa bona. E se ke ya hloleha. Lebidi le leng le leng la tshupanako ya Modimo ya bohloleho le sebetse ka phetheho hoseng hona, ha bakudi ba tlotswa. Re e kopa bakeng sa Jesu Kreste, ka Lebitso la Hae. Amen.

Ha o ka dumela feela, dumela feela,
Tsohle di ka etswa, feela . . .

¹⁴⁶ Kamoo sefela seo se etsang ntho ho nna! Makgolo a dipuo . . . ke utlwile bahetene le Bakgothu ba bina hono ha ke ne ke atamela kalana.

¹⁴⁷ Yena mosadi enwa, yona piano ena, kamoo ke tsebang, e nthutile sefela seo, dilemo tse leshome le motso o le mong tse fetileng, pele ke tlohela molaetsa. Paul Rader, motswalle wa ka, o se ngotse.

¹⁴⁸ Jesu, ha a theoha thabeng, A bona moshanyana a nang le sethwathwa. Barutuwa ba sa kgone ho etsa letho ka yona. A re, “Morena, ako hauhele ngwana ka.”

¹⁴⁹ A re, “Nka kgona ha o ka dumela, hoba tsohle di ka etswa; dumela feela.” Ke hona moo Paul a fumaneng sehloho sa hae, *Dumela Feelu*. “O- . . .”

¹⁵⁰ Jwale sheba hole le lefu la hao jwale. “Feelu du- . . .” Na o ka se etse jwalo? “Tsohle di ka etswa, feela . . .”

¹⁵¹ Hopolang feela, O eme mona. O a rateha. O e tshepisitse. O hadimisa masedi a Hae; shebang ba bang ba fodiswang. Ehlide, o ka kgona, le wena. “Ntadimeng,” monna ya sefou o fodisitswe, le a bona. Shebang ba bang, shebang mono kamoo, kgele, seo Morena a se entseng! “. . . di ka etswa . . .”

¹⁵² Ba bakae ba dumelang hona jwale hore le na le tumelo pelong tsa lona ho re, “Ke a dumela e phethilwe. Ke a dumela nka Mo amohela hona jwale. Ke a dumela nka re ke tla fola. Ho sa tsottelehe se etsahalang, ke re ho thaba ena ya bolwetse, ‘Sutha o tlohe ho nna, kapa baratuwa ba ka, kapa seo e leng sona.’ Mme ke a dumela e tla etsahala”?

¹⁵³ Hlokomela se etsahalang. Bolwetse bo tla qala bo heleha. Bo tla qalella ho tloha. Ntho ya pele o a tseba, ngaka e tla re, “Ho etsahetseng mona?” Ke hantle, ha o ka dumela.

¹⁵⁴ Na o ka tla, Moena Neville? Jwale bana ba pakeng tsa ditulo tsena *mona*, ba eme ka *mona*. Mme lona ba pakeng tsa ditulo tsena *mona*, le pote ka morao mme le tle jwalo, ha le rata, re tle re etse mola o le mong to. Re tla laela baholo ho tswela kapele, ho ema mmoho le batho, ha ba ntse ba rapellwa.

¹⁵⁵ Jwale, ngwananana e monyenyanane, re tla theoha mme re rapelle ngwananyana enwa ya robetseng mona. Re tla theohela feela moo a leng teng.

¹⁵⁶ Ke batla bao ba...ba bang ba tlileng ho rapellwa, ba fetele lehlakoreng lena jwale. Ke batla motho e mong le e mong ka mona a dule thapelang hona jwale. Le wena o karolo e amanang le sena. Bathusi ba emeng hodimo mono ba tla le supisa mola oo le lokelang ho koloka ho wona nakong ena.

Tsohle di ka etswa, dumela feela.

Se tshabe, mohlatswana, sefapanong ho ya teroneng,

Lefung ho kena bophelong O lefetse ba Hae;
Matleng a lefatsheng, matla wohlé hodimo,
A neilwe Yena bakeng sa mohlape wa 'rato la
Hae.

Naledi ya Kresemose e reng jwale?

Dumela feela, dumela feela,
Tsohle di lokile, dumela feela;
Dumela feela, dumela feela,
Tsohle di lokile, dumela feela.

¹⁵⁷ Metswalle ya ka e ratehang, ho na le ba bangata ka mona ba le rapellang jwale; banna ba lokileng le basadi ba lokileng, bahalaledi, basadi le banna ba barapedi.

¹⁵⁸ Moena Neville wa ka oeme lephakong la ka mona, eo ke mo tsebileng e le motho wa morapedi ka dilemo. Batho ba tlang kwano ba tswa ka ntle ho motse, ba ile ba ntetsetsa mohala, ho re, "Thaka le le nyenyane leo, e leng modisa wa hao ke mang? Mphe aterese ya hae; ke batla ho mo ngolla. O bonahala e le monna ya tshepehang." Ke thabo ho nna ho ka re, "homme e mong wa batho ba halalelang ka ho fetisa bao ke ba tsebang." O phela seo a se rerang mme o bua ka sona. O tshwere lefiso la tlolo letsohong la hae.

Modimo o na le matla letsohong la Hae.

¹⁵⁹ Le na le tumelo pelong tsa lona? Ha le ena le yona, e tlamehile ho etsahala. Ka ntle mona, bareri ke bana, batho ba barapedi ba dutseng mona ba tla be ba le rapella. Ntho e nngwe e tlameha ho etsahala jwale.

¹⁶⁰ Ntho e nngwe e o tsamaisitse bohole bona; e ne e le Naledi, jwale, Naledi, Naledi ya Meso. Jwale amohela bohloleho, Lesedi la Bosafeleng. Jwalo feela ka ha wena, re latela tsamaiso ena, jwaloka ho o kolobetsa, leha e le eng, o a bona. "Tlotso mokudi ka oli, ba rapelle; thapelo ya tumelo e tla pholosa mokudi."

¹⁶¹ Jesu o buile, mantswe a qetelo ho Kereke ya Hae, "Mehlolo e tla tsamaya le ba dumelang ke yona ena; ba tla bea matsoho hodima ba kulang, ba tla fola." Ka mantswe a mang, nka bua tjena, ka e bea ka mantswe ao le a tsebang,

"Hohle moo Evangedi enwa e bolelwang, lefatsheng lohle, bahlanka ba Ka ba tla bea matsoho hodima ba kulang, ba tla fola." Hantle. Le a bona?

¹⁶² Jwale ntho e nngwe feela e ka fekisang hono, yona, ke ho se dumele. Le a bona, hoo ha ho bee...esita leha—leha nna le moena re ne re...re sa tshwanela ho bolela Evangedi; etswe, ha re a lokela, ke ka mohau wa Hae feela. Empa, ho sa tsottelehe seo re ka se etsang, ke Lentswe la Hae. Yena, ha A tlameha ho re kgomarela, empa O tlameha ho dula Lentsweng la Hae, "Ha o ka dumela."

¹⁶³ Ba bakae ka ntle mono letshweleng ba tla rapella batho baa? Phahamisang matsoho a lona. Ke batla lona batho ting le shebe kwana. Ke hona moo dithapelo di yang teng, nqa Lehodimo bakeng sa lona jwale. Jwale hlooho e nngwe le e nngwe e inamisitswe mme e mong le e mong o a rapela, moena a sa tlotsa.

¹⁶⁴ Motsotso feela jwale, re tla etsetsa bana ba mona thapelo ena ya phutheho.

¹⁶⁵ Morena ya mohau, jwale re tswela ka pele jwaloka bahlanka ba Hao, phethisa kabelo ya bareri. Ho na le ba bangata mona, Morena, moleng, ba kulang haholo, holo, ntle le pelaelo. Ba bang ba bona ba ntshing tsa lefu. Mme ba bang ba bona ba sa dutse ditulong tsa bona. Ho tea mohlala, ngwanana e monyenyan ya tswang Florida. Ba bang ba teng mona ba tswang Georgia le ho tswa dibakeng tse fapaneng, ho tswa hodimo kwana Indianapolis, ba bang ho tswa kwana Ohio, ba bokane sehlotsawaneng sena hoseng hona, esale ba eme mona dihoteleng le ntho e nngwe le e nngwe, ho emela hora ya ho rapellwa. Ba kile ba etela dikopano. Ba bone letsoho la Hao le tsamaya le sebetsa. Mme hantle mona jwale e...Morena, tlosa tshomo ya Santa Klause le ho ba tlisetsa mpho ya nnete ya Kresemose. Ba fe bophelo bo botle hona jwale, Morena, hoba ba tlide ka ho dumela.

¹⁶⁶ Mme re a tla, ho ema pakeng tsa bona le Morena Modimo wa Lehodimo, ho ba buella, ho rapela le ho bua ka lentswe la rona, bakeng sa bona. Ho se be le a mong wa bona, Morena, ya hloleheng ho ba le tumelo.

¹⁶⁷ Re a tseba Lentswe le a e bolela. Re a tseba re a e dumela. Jwale, Morena, ba ke ba e dumele mme ba fumane seo ba se kopileng. Re tswela kapele jwale re le manqosa a Kreste, ka mmele wona wohle wa kereke, ho rapella phodiso ya bona ka kgopolole e le nngwe. Ho ke ho be jwalo. Mme ha ba tsamaya, ba tsamaye ka nyakallo e kgolo haholo hobane e—e Letsatsi la selemo le re tjhabetse. Mabone a Lehodimo a maholo a re kgantshitse, mme re bona Morena Jesu ya tsohileng ka Matla a Hae le Kganya. Amen.

¹⁶⁸ Ere a sa tlotswa, ka Lebitso la Morena Jesu, re bea matsoho hodima hae, le ho kopa hore bolwetse ba hae bo fodiswe ke letsoho la Modimo o Matlawohle, ka Lebitso la Jesu. Amen.

¹⁶⁹ Modimo a o hlohonolofatse. Eya mme o e amohele, ka Lebitso la Morena Jesu.

¹⁷⁰ Ka ho tlotswa, ka Lebitso la Morena Jesu, re kopa ho tle ho abjwe takatso ya pelo ya hae, ka Lebitso la Morena Jesu Kreste. Amen.

¹⁷¹ Ho tlotswa ka oli, re bea matsoho hodima moena wa rona,
ka Lebitso... 

LESEDI LE LEHOLO LE PHATSIMANG SST57-1222
(The Great Shining Light)

Molaetsa wona, ka Moena William Marrion Branham, o rerilwe tshimolohong ka Senyesemane ka Sontaha hoseng, Tshitwe, 22, 1957 mane Tabernakeleng ya Branham, e Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2015 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org